

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 52. sjednici Predstavničkog doma, održanoj 29. augusta 2013. godine, i na 32. sjednici Doma naroda, održanoj 12. septembra 2013. godine, usvojila je

ZAKON
O IZMJENAMA I DOPUNAMA ZAKONA O IMPLEMENTACIJI KONVENCIJE O
ZABRANI RAZVOJA, PROIZVODNJE, GOMILANJA I UPOTREBE HEMIJSKOG
ORUŽJA I O NJEGOVOM UNIŠTAVANJU

Član 1.

U Zakonu o implementaciji Konvencije o zabrani razvoja, proizvodnje, gomilanja i upotrebe hemijskog oružja i o njegovom uništavanju („Službeni glasnik BiH“, broj: 15/06) u članu 2. tačka g) riječ „FSF“ zamjenjuje se riječju „PSF“.

U članu 2. tačka i) riječ „formuliranje“ zamjenjuje se riječju „formulacija“.

U članu 2. tačka v) riječi: „Ministarstvu vanjskih poslova BiH“ zamjenjuju se riječima: „Ministarstvu vanjske trgovine i ekonomskih odnosa BiH“.

U članu 2. poslije tačke z) tačka se zamjenjuje tačka-zarezom i dodaje se nova tačka aa) koja glasi:

„aa) vanjskotrgovinski promet je uvoz, izvoz i tranzit hemikalija.“

Član 2.

U članu 5. st. (7), (8) i (9) mijenjaju se i glase:

„(7) Odgovorna lica dužna su o aktivnostima koje uključuju hemikalije s Popisa 1 (proizvodnja, nabavka, posjedovanje, prenošenje ili korištenje) obavještavati Državno koordinaciono tijelo, u skladu s odredbama Konvencije.

(8) Odgovorna lica dužna su obavijestiti Državno koordinaciono tijelo i u slučaju bilo kakvih izmjena ili adaptiranja pogona za proizvodnju hemikalija s Popisa 1.

(9) Ministarstvo vanjske trgovine i ekonomskih odnosa BiH, na prijedlog Državnog koordinacionog tijela, izdaje uputstvo o obavezi i obimu dostavljanja podataka za aktivnosti s hemikalijama s Popisa 1.“

Član 3.

U članu 6. st. (2) i (3) mijenjaju se i glase:

„(2) Odgovorna lica dužna su o aktivnostima koje uključuju hemikalije s Popisa 2 (proizvodnja, obrada i potrošnja) obavještavati Državno koordinaciono tijelo, u skladu s odredbama Konvencije, odnosno ako godišnja proizvodnja, obrada ili potrošnja u pojedinačnom pogonu premašuje:

- a) 1 kg hemikalije s Popisa 2A, označenog s "*";
- b) 100 kg bilo koje druge hemikalije s Popisa 2, Dio A;
- c) 1 t hemikalije s Popisa 2, Dio 2.

(3) Ministarstvo vanjske trgovine i ekonomskih odnosa BiH, na prijedlog Državnog koordinacionog tijela, izdaje uputstvo o obavezi i obimu dostavljanja podataka za aktivnosti s hemikalijama s Popisa 2.”

U članu 6. stav (4) briše se.

Član 4.

U članu 7. st. (2) i (3) mijenjaju se i glase:

„(2) Odgovorna lica dužna su o aktivnostima koje uključuju hemikalije s Popisa 3 (proizvodnja, obrada i potrošnja) obavještavati Državno koordinaciono tijelo, u skladu s odredbama Konvencije, odnosno ako godišnja proizvodnja, obrada ili potrošnja premašuje 30 tona hemikalija s Popisa 3.

(3) Ministarstvo vanjske trgovine i ekonomskih odnosa BiH, na prijedlog Državnog koordinacionog tijela, izdaje uputstvo o obavezi i obimu dostavljanja podataka za aktivnosti s hemikalijama s Popisa 3”.

U članu 7. stav (4) briše se.

Član 5.

Član 8. mijenja se i glasi:

„Član 8. (Hemijske smjese)

Za hemijske smjese koje sadrže 30% ili manje hemikalija s Popisa 2B ili Popisa 3 Aneksa o hemikalijama nije potrebno dostavljati podatke Državnom koordinacionom tijelu.”

Član 6.

Član 9. mijenja se i glasi:

„Član 9. (Uslovi i isprave za vanjskotrgovinski promet hemikalija)

(1) Za vanjskotrgovinski promet hemikalija sadržanih u Aneksu o hemikalijama te hemijskih smjesa koje sadrže jednu ili više hemikalija iz Aneksa o hemikalijama izdaje se isprava u skladu sa Zakonom o kontroli vanjskotrgovinskog prometa robe i usluga od strateške važnosti za sigurnost Bosne i Hercegovine („Službeni glasnik BiH”, broj 103/09).

(2) Ministarstvo vanjske trgovine i ekonomskih odnosa BiH izdaje isprave za vanjskotrgovinski promet hemikalija i hemijskih smjesa iz stava (1) ovog člana samo ako su one namijenjene za svrhe koje nisu zabranjene ovim zakonom.

(3) Vanjskotrgovinski promet hemikalija s Popisa 1 i Popisa 2 može se obavljati samo u, iz i kroz države članice Konvencije i samo ako će hemikalije s Popisa 1 biti upotrijebljene za istraživačke, medicinske, farmaceutske ili zaštitne svrhe.

(4) Hemikalije s Popisa 1, uvezene u skladu sa stavom (2) ovog člana, ne mogu se ponovo izvoziti u treće zemlje.

(5) Najmanje 30 dana prije svakog prijenosa hemikalije s Popisa 1 u drugu državu članicu obje države članice dužne su o prijenosu obavijestiti Tehnički sekretarijat Organizacije.

(6) Prijenos u medicinske ili dijagnostičke svrhe hemikalije saxitoxin s Popisa 1, u količini od 5 mg ili manje, nije uslovljen rokom slanja obavještenja iz stava (5) ovog člana, već se obavještenje daje u vrijeme prijenosa.

(7) Ponovni izvoz već uvezenih hemikalija s Popisa 2 i Popisa 3 dozvoljen je ako se krajnji korisnik nalazi na teritoriji države članice Konvencije.

(8) Izvoz hemikalija s Popisa 3 u države koje nisu članice Konvencije dozvoljen je ako zemlja prijema izda certifikat krajnjeg korisnika uz izjavu:

- a) da će hemikalije biti korištene za svrhe koje nisu zabranjene Konvencijom;
- b) da hemikalije neće biti ponovo izvezena nakon njihovog uvoza;
- c) o vrsti i količini hemikalija;
- d) o krajnjoj svrsi i
- e) o imenu i adresi krajnjeg korisnika.”

Član 7.

Član 10. briše se.

Član 8.

Član 11. mijenja se i glasi:

„Član 11. (Registar isprava)

Ministarstvo vanjske trgovine i ekonomskih odnosa BiH održava registar isprava izdatih za vanjskotrgovinski promet hemikalija s Popisa 1, Popisa 2 i Popisa 3 i informacije o izdatim ispravama dostavlja Državnom koordinacionom tijelu jednom godišnje.“

Član 9.

Član 12. mijenja se i glasi:

„Član 12. (Ograničenje trgovine)

Državno koordinaciono tijelo vodi računa o odlukama Organizacije i odredbama Konvencije, te posredstvom Ministarstva vanjske trgovine i ekonomskih odnosa BiH može ograničiti trgovinu određenim hemikalijama sa zemljama koje nisu članice Konvencije.”

Član 10.

U članu 13. riječi: „nosioci aktivnosti za koje je, prema ovom Zakonu, potrebno posjedovati dozvolu” brišu se, a riječi: „Ministarstvo vanjske trgovine i ekonomskih odnosa BiH” zamjenjuju se riječima: „Državno koordinaciono tijelo”.

Član 11.

U članu 14. stav (1) iza riječi: „Ministarstvu vanjske trgovine i ekonomskih odnosa BiH“ treba staviti zarez i dodati riječi: „Državnom koordinacionom tijelu“.

U članu 14. st. (2) i (3) mijenjaju se i glase:

„(2) Odgovorna lica dužna su dostavljati Državnom koordinacionom tijelu i podatke o prizvodnji prekidnih organskih hemikalija, uključujući PSF hemikalije, kao i sve druge podatke neophodne za ispunjenje obaveza iz Konvencije, ako ih zatraži Državno koordinaciono tijelo.

(3) Ministarstvo vanjske trgovine i ekonomskih odnosa BiH, na prijedlog Državnog koordinacionog tijela, uputstvom propisuje rokove, sadržaj i način dostavljanja podataka iz st. (1) i (2) ovog člana.“

Član 12.

Član 15. mijenja se i glasi:

„Član 15. (Državno koordinaciono tijelo)

(1) Radi ispunjenja obaveza po Konvenciji, osniva se Državno koordinaciono tijelo sa zadatkom da bude središte efikasne veze s Organizacijom i drugim državama članicama, a o čemu je dužno obavijestiti Organizaciju.

(2) Državno koordinaciono tijelo koordinira aktivnosti tijela i institucija u Bosni i Hercegovini, u vezi s provođenjem odredbi Konvencije.

(3) Državno koordinaciono tijelo ovlašteno je da od svih nadležnih organa i institucija u Bosni i Hercegovini, kao i od svih pravnih i fizičkih lica, zatraži dostavljanje informacija i podataka koji se odnose na ispunjenje obaveza Bosne i Hercegovine, koje proizlaze iz odredbi Konvencije.

(4) Državno koordinaciono tijelo ovlašteno je da da nalog nadležnim organima i institucijama, kao i pravnim i fizičkim licima, ako je riječ o ispunjavanju obaveza Bosne i Hercegovine koje proističu iz Konvencije.

(5) Nadležni organi i institucije, kao i pravna i fizička lica, dužni su u ostavljenom roku dostaviti tražene podatke i informacije iz stava (3) ovog člana, kao i postupiti po nalogu Državnog koordinacionog tijela iz stava (4) ovog člana.

(6) Državno koordinaciono tijelo čine koordinator i članovi. Članove Državnog koordinacionog tijela, na prijedlog Ministarstva vanjske trgovine i ekonomskih odnosa BiH, imenuje Vijeće ministara BiH. Članovi Državnog koordinacionog tijela su predstavnici: Ministarstva vanjske trgovine i ekonomskih odnosa BiH, Ministarstva vanjskih poslova BiH, Ministarstva civilnih poslova BiH, Ministarstva sigurnosti BiH, Ministarstva odbrane BiH, Uprave za indirektno oporezivanje BiH, Federalnog ministarstva energije, rudarstva i industrije, Ministarstva industrije, energetike i razvoja Republike Srpske, Federalnog ministarstva zdravstva, Ministarstva zdravlja i socijalne zaštite Republike Srpske i predstavnik Vlade Brčko Distrikta BiH. Državno koordinaciono tijelo imenuje se na period od četiri godine. Članovi Državnog koordinacionog tijela iz svog sastava biraju koordinatora.

(7) Državno koordinaciono tijelo je u sastavu Ministarstva vanjske trgovine i ekonomskih odnosa BiH.

(8) Državno koordinaciono tijelo donosi poslovnik o radu. Državno koordinaciono tijelo sastaje se najmanje jedanput mjesečno. Sredstva za rad i aktivnosti Državnog koordinacionog tijela osiguravaju se iz budžeta BiH.

(9) U vezi s obaveznom saradnjom s Organizacijom, Državno koordinaciono tijelo:

- a) priprema sporazum o pogonu, koje BiH bude zaključivala s Organizacijom, a u skladu s Konvencijom;
- b) priprema zahtjeve za naknadu troškova od Organizacije nastalih u vezi s provedenim međunarodnim inspekcijama, u slučajevima kada BiH, u skladu s odredbama Konvencije, ima pravo na njihovu naknadu;
- c) priprema prihvata i pratnju međunarodnih inspekcija, te sarađuje s međunarodnim inspektorima.”

Član 13.

Član 16. mijenja se i glasi:

„Član 16.

(Ministarstvo vanjske trgovine i ekonomskih odnosa BiH)

Osim izdavanja dozvola definiranih u članu 9. ovog zakona, Ministarstvo vanjske trgovine i ekonomskih odnosa BiH:

- a) dostavlja podatke o vanjskotrgovinskom prometu hemikalija iz Aneksa o hemikalijama kao i ostale podatke koje zatraži Državno koordinaciono tijelo, neophodne za obavezno deklariranje Organizaciji;
- b) priprema prihvata i sarađuje s inspeksijskim timovima Organizacije i pruža neophodnu pomoć.”

Član 14.

U članu 17. tačka a) riječ „prikuplja“ zamjenjuje se riječju „dostavlja“.

Član 15.

Iza člana 18. dodaje se novi član 18a. koji glasi:

„Član 18a.

(Ministarstvo civilnih poslova BiH)

Ministarstvo civilnih poslova BiH:

- a) dostavlja Državnom koordinacionom tijelu podatke neophodne za obavezno deklariranje Organizaciji iz nadležnosti Ministarstva civilnih poslova BiH, kao i ostale podatke koji su zatraženi;
- b) priprema prihvata i sarađuje s inspeksijskim timovima Organizacije i pruža neophodnu pomoć.

Član 16.

U članu 19. stav (1) briše se.

U članu 19. st. (2), (3), (4) i (5), koji postaju st. (1), (2), (3) i (4), mijenjaju se i glase:

„(1) Nadležni organi Uprave za indirektno oporezivanje BiH prihvataju prijavu za uvoz, izvoz ili tranzit hemikalija iz Aneksa o hemikalijama te hemijskih smjesa koje sadrže jednu ili više hemikalija iz Aneksa o hemikalijama, izvan i preko teritorije Bosne i Hercegovine samo onda kada deklarant predloži ispravu navedenu u članu 9. ovog zakona.

(2) Uprava za indirektno oporezivanje BiH, Ministarstvo sigurnosti BiH i organi unutrašnjih poslova dužni su, bez odgađanja, obavijestiti Državno koordinaciono tijelo ako tokom vršenja dužnosti otkriju da je počinjena povreda ovog zakona ili odredbi Konvencije.

(3) U slučaju otkrivanja pokušaja uvoza, izvoza ili tranzita u, iz ili kroz teritoriju Bosne i Hercegovine hemijskog oružja, ono se oduzima. U slučaju otkrivanja pokušaja uvoza, izvoza ili tranzita u, iz ili kroz Bosnu i Hercegovinu hemikalija bez izdate isprave propisane članom 9. ovog zakona, hemikalije se privremeno oduzimaju do okončanja odgovarajućeg postupka. Oduzeto hemijsko oružje ili privremeno oduzete hemikalije bit će uskladištene u objektima koje odredi Državno koordinaciono tijelo. Troškove skladištenja i ostale troškove koji se odnose na ispunjenje obaveza u skladu s Konvencijom, a koji nastanu u vezi s oduzetim hemijskim oružjem ili privremeno oduzetim hemikalijama, snosi vlasnik ili posjednik hemijskog oružja ili hemikalija.

(4) Ministarstvo vanjske trgovine i ekonomskih odnosa BiH, na prijedlog Državnog koordinacionog tijela, posebnim uputstvom propisuje postupanje i primjenu odredbi iz st. (2) i (3) ovog člana.”

Član 17.

U članu 20. stav (2) mijenja se i glasi:

„(2) Baza podataka koja se odnosi na izvoz i uvoz hemikalija s Popisa 1, Popisa 2 i Popisa 3 vodi se i održava u Ministarstvu vanjske trgovine i ekonomskih odnosa BiH.”

Član 18.

U članu 21. st. (1), (2), (5), (6) i (7) mijenjaju se i glase:

„(1) Radi uspostavljanja nadzora u području provođenja obaveza iz Konvencije i ovog zakona, Ministarstvo, na prijedlog Državnog koordinacionog tijela, imenuje inspektore za područja uređena Konvencijom.

(2) U slučaju potrebe, Državno koordinaciono tijelo ima pravo i obavezu, a u zavisnosti od vrste zadatka, osnivati odgovarajuće inspekcijske timove, na čelu sa šefom inspekcijskog tima. Inspekcijski tim čine inspektori imenovani u skladu sa stavom (1) ovog člana.

(5) U slučaju otkrivanja neregularnosti ili razlika u pogledu aktivnosti koje su deklarirane u skladu s odredbama ovog zakona, inspektor ima pravo i obavezu:

- a) uz naznaku roka za ispunjenje, naložiti preduzimanje mjera za njihovo otklanjanje;
- b) naložiti prekid proizvodnje, potrošnje, obrade, trgovine, tranzita i skladištenja hemikalija;
- c) naložiti prekid aktivnosti za koje je, u skladu s članom 9. ovog zakona, potrebno imati odgovarajuću ispravu, ako ona nije izdata.

(6) Inspektor, bez odgađanja, obavještava Državno koordinaciono tijelo, o mjerama preduzetim u skladu sa stavom (5) ovog člana.

(7) Protiv rješenja inspektora, kojim se određuju mjere iz stava (5) ovog člana, dozvoljena je žalba Ministarstvu vanjske trgovine i ekonomskih odnosa BiH, Državnom koordinacionom tijelu, u roku od 15 dana od dana izdavanja rješenja. U postupku odlučivanja po žalbi primjenjivat će se odredbe Zakona o upravnom postupku („Službeni glasnik BiH”, br. 29/02, 12/04, 88/07, 93/09 i 41/13).“

Član 19.

U članu 22. st. (1), (2) i (3) mijenjaju se i glase:

„(1) Nakon prijema notifikacije o dolasku međunarodne inspekcije, Državno koordinaciono tijelo bez odgađanja preduzima aktivnosti radi osnivanja pratećeg tima u zemlji (u daljnjem tekstu: prateći tim).

(2) U zavisnosti od vrste inspekcije, članovi pratećeg tima mogu biti predstavnici Ministarstva vanjske trgovine i ekonomskih odnosa BiH, Državnog koordinacionog tijela, Ministarstva civilnih poslova BiH, Ministarstva sigurnosti BiH, Ministarstva odbrane BiH i, po potrebi, predstavnici drugih nadležnih institucija i organa u BiH.

(3) Šef pratećeg tima je predstavnik Državnog koordinacionog tijela. U slučaju inspekcije vojnih objekata ili inspekcije starog hemijskog oružja, šef pratećeg tima je član Državnog koordinacionog tijela iz Ministarstva odbrane BiH.“

U članu 22. stav (7) poslije riječi: „koje će“ dodaju se riječi: „na prijedlog Državnog koordinacionog tijela“.

Član 20.

U članu 25. riječi: „za Organizaciju“ zamjenjuju se riječima: „Državnom koordinacionom tijelu“, a na kraju rečenice tačka se zamjenjuje zarezom i dodaju se riječi: „za Organizaciju“.

Član 21.

U članu 27. riječi: „dva mjeseca“ zamjenjuju se riječima: „šest mjeseci“.

Član 22.

U članu 28. stav (1) tač. a), c), d) i e) mijenjaju se i glase:

- „a) odbije ili propusti da u datom roku dostavi tražene podatke (član 13. st. (1) i (2) i član 14. stav (5) ovog zakona);
- c) ne osigura nesmetan pristup inspiciranoj lokaciji ili ne omogući uvid u dokumentaciju i evidenciju koje inspeksijski tim ili međunarodni inspeksijski tim smatraju značajnim za obavljanje inspekcije (član 21. stav (4) i član 22. stav (6) ovog zakona);
- d) koja ne postupi po nalogu Državnog koordinacionog tijela (član 14. stav (5) ovog zakona) ili po nalogu inspektora (član 21. stav (5) ovog zakona);
- e) koja ne ustanovi odgovarajuće zaštitne mjere (član 12. ovog zakona).“

Član 23.

Član 29. briše se.

Član 24.

Poslije člana 30. dodaje se novi član 30a. koji glasi:

„Član 30a.

(Stavljanje van snage podzakonskih akata)

Stupanjem na snagu ovog zakona stavljaју se van snage sljedeći podzakonski akti:

- a) Uputa o uvjetima i postupku za izdavanje dozvola za uvoz, izvoz i tranzit hemikalija sadržanih u Aneksu o hemikalijama („Službeni glasnik BiH“, broj 11/08);
- b) Uputa o uvjetima i postupku za izdavanje dozvola za proizvodnju, nabavku, posjedovanje, prijenos ili korištenje hemikalija s Popisa 1 („Službeni glasnik BiH“, broj 11/08);
- c) Uputa o uvjetima i postupku za izdavanje dozvola za proizvodnju, obradu i potrošnju hemikalija s Popisa 2 („Službeni glasnik BiH“, broj 11/08);
- d) Uputa o uvjetima i postupku za izdavanje dozvola za proizvodnju, obradu i potrošnju hemikalija s Popisa 3 („Službeni glasnik BiH“, broj 11/08);
- e) Uputa o proceduri prijema međunarodnih inspektora i formiranja eskortnog tima („Službeni glasnik BiH“, broj 11/08);
- f) Uputa o uvjetima i postupku izdavanja dozvola za skladištenje hemikalija sadržanih u Aneksu o hemikalijama („Službeni glasnik BiH“, broj 11/08);
- g) Uputa o sadržaju, rokovima i načinu dostavljanja podataka („Službeni glasnik BiH“, broj 11/08).“

Član 25.

Ovaj zakon stupa na snagu osmog dana od dana objavljivanja u „Službenom glasniku BiH“.

Broj: 01,02-02-1-18/13
12. septembra 2013. godine
Sarajevo

Predsjedavajući
Predstavničkog doma
Parlamentarne skupštine BiH

dr. Denis Bećirović

Predsjedavajući
Doma naroda
Parlamentarne skupštine BiH

mr. Ognjen Tadić